

張文定公靡悔軒集

張文定公靡悔軒集卷之十一

記二十四首

廸儉堂記

予讀唐風而知聖人之思遠也其流澤之長也
如堯茅茨土堦皇皇焉惟斯民之艱食是慮禹率是也
卑宮菲食日孳孳不敢暇然則瀉汭之承風塗山氏之
衍裕可以想見於百代之上而葛覃采芣廸德於周亦
孰非聞風而興起焉者乎夫常人之情樂華侈而惡節
束是故繁哇奪耳靡曼奪目心蕩情逸百務墮焉惟夫
恬澹朴素之習成而靜專凝壹之心固是故養心莫如

寡慾養德莫如儉以儉廸子孫者善之善者也然而濡
染之深培養之密化導之切則恒存乎閨閫之內虞夏
殷周之盛未有不由此者也封太孺人黃氏蘇之望族
也孝誠純懿得于天性及笄而嬪于桂巖先生浦公公
少好讀書家藏數萬卷雖甚寒暑披誦不間晝夜太孺
人常篝燈火劬辟纊撰供具以相其勤蓋自籍學登甲
榜餘三十年如一日性儉素居惟服䟽茹淡非歲時賓
饗未嘗御魚肉也故諸子皆克承教範飭躬勵行卓有
成立而長子道徵以文章德器顯于詞林進陟官贊且
用是勵翼

明時以臻虞夏殷周之治可謂盛哉往歲太孺人榮膺
封勅有迪儉寶慈積善累慶之褒蓋實錄也茲道微奉
使南歸將敬揭

制辭彩繪金書顏其堂曰迪儉以昭

君貺而章毋德且永示于後之人瀕行屬予爲記予始
識宮贊君于南雍廼今又幸同事于史館于

青宮稔知太孺人所以贊桂巖訓子姓佑啓宮贊兄弟
以式昌于無旣者其來非一朝夕之積也宜乎榮壽樂
康親見其子之駸駸嚮用古所稱昭儉德以獎臨百官
者將自其子翊而成之則太孺人之迪德奚止其一家

焉爾哉夫家國一道昌於儉儉於靡古今一也官贊君
養之既素且方揚聲史局他日當自書之予不能悉述
云

復初齋記

齋以復初名識求善也何謂善理之在天而吾得以爲
性者也性吾所自有而何以待於求性之初本善而氣
質得蔽之外物得誘之是故求善以復其初焉耳人之
生固若禽獸草木然而其所獨異者寧可不思有以存
之邪顧夫人之所知以行者往往於饑食渴飲趨利避
害之外無餘事而與物無異豈其初之本然也哉氣質

之蔽不思所以明之也外物之誘不思所以去之也故
蒙眊沒溺以至於此耳而其初則固有善而無惡也有
耳目則有聰明之德有言貌則有恭從之德而心主乎
其間心之德則有所謂仁義禮智之性焉有所謂惻隱
羞惡辭讓是非之情焉此則其初之本然者也然方其
蒙眊沒溺而不知所求也而介然之頃其心亦有煥然
而自悟者茲非其本然者之終不可昧歟故有志者必
因是以求復焉復之之道吾嘗求之矣一陽來復其卦
曰復而係之者曰不遠復無祗悔孔子贊易以顏氏之
子當之觀其答顏淵問仁不過曰克己復禮夫已之不

克而求禮之復猶鑑之垢不知去而坐求其明有是理
哉然而克復之功尤不容以苟焉而施也其必先知明理
欲之辯孰爲已吾將克焉孰爲禮吾將復焉其毫末纖
悉已洞照於吾心夫然後奮其剗勇之氣以快擇之自
吾身之接物有視聽言動也而一或出於人欲之私者
制諸中而不復萌作主之以誠持之以悠久使視明聽
聰貌恭言從存諸心而達諸外莫非天理之正而纖芥
人欲不成少累焉則庶乎天之所以與我者不失而我
之所以爲人者無忝矣夫是之謂復初而非有所待於
外也然自其末而觀之一念之善不可謂非復也探其

本則一念不善不得謂之復者非他性之初善無所不備也故必如顏子之三月不違孔子乃以爲庶幾耳矣欲復初者其無以予言爲迂哉

尋樂齋記

某以尋樂名齋請予言爲記予非知樂者也而其所以尋之之方則方與共圖焉故不辭而爲之言曰人之情凡有所觸於外而得於中則其樂油然而生矣樂豈有定在邪而必待於尋而後得也然觀人之於樂不知所以尋之也而失焉者多矣昔之人固有樂奕碁者有樂鍛者有樂琴瑟之聲者亦云有所得而樂之也然皆玩於

物而喪其志徇乎外而亡其中吾疑夫樂之不在是也
吾之心不有真可樂者乎夫苟欲尋其樂亦在乎自尋
而自得之耳不然雖使予之得是樂也指而語諸人曰
如是則樂彼其信之乎濂溪之教二程每令尋孔子顏
子樂處以爲先得我心之所同然者孔子顏子耳孔子
飯蔬食飲水樂亦在其中顏子尋而得之故能不以簞
食瓢飲而改其樂是其心必有所真可樂者矣而不言
其所以樂豈其樂之深妙而不可以言傳歟將有端緒
之可求而人得以心受之也雖然孔子亦嘗微啓其端
矣知之者不如好之者好之者不如樂之者夫所謂知

之者知何物也所謂好之者好何物也是物也其於人
人之心迷而不能知固可哀矣知而不能好則是知且
未至何暇言樂是故聖賢之樂吾固未之知也聖賢之
所謂道者吾求有以知之而已耳知而好好而不能已
則彼所謂樂者亦將庶幾有得乎傳孔顏之學者孟子
也孟子指言仁義之實而以樂斯二者次諸智與禮之
後吁樂其可以從是而尋之矣

存存齋記

存存者何言吾性之存也性吾所自有而非外至惡用
以存存言哉性雖在我而外誘之私或得而奪之是故

有存不存之說耳夫人之生得天命之正以爲性而亦不能無形氣之私生於其間性命存乎內者也形氣交乎外者也方其形氣未交本然在中則固無待於存之而自無不存矣旣其動也理不足以勝私而外者得以攻乎內於是乎本然之真靜者與物俱化而吾之性亡焉然而淪胥陷放之餘亦有介然暫復之頃則其在我者之終不可泯也而即此存之亦庶乎可得而存矣但或知之未精守之未固則亦日月至焉而不能以恒存是亦未得謂之存存也維天之命於穆不已蓋天之所以爲天也而人受天命之正以爲性乃使之暫存暫亡

而已其不已負於天命矣乎蓋必智見日崇而物無不
窮涵養日熟而理無不體夫然後內而私意無所因而
生外而邪誘無所從而入夫是之謂能一一則誠誠則
不息而於穆不已之天命實與之渾合而無間焉夫是
之謂存存而非有所假於外也此皆聖人之事而所以
學聖之要亦未有外焉者故以名吾齋以著吾志然吾
見世之人以爲聖非可學而自失其真者多矣故復記
其所嘗自誦者以自監焉

南行記

正德六年辛未秋七月十九日丁卯

上疏乞歸省廿八日丙子吏部覆奏廿九日丁丑得

旨曰俞八月六日癸未

上賜鈔乙千貫為行資是日

家君壽日也越一二日將行適盜滋熾取潞河舟數百艘為浮橋橫絕天津南不果十六日癸巳辭

朝廿二日巳亥出京同僚湛編修原明輩數人同鄉陳主事公輔輩十餘人餞于崇文門外工部曾主事叔溫迎于通州申刻抵張家灣廿三日庚子夜五鼓夢為蜺蜺騰空中為龍向東南去次日辛丑與呂僉事克中方舟而下廿七日甲辰至天津廿八日巳巳先行擬泊

楊青驛比至其土人給曰是多寇輒復行逆風雷電晦
真夜漏下四鼓乃抵泊獨漉九月三日庚戌過桑園及
連兒窩覘見兩涯家置騎士蓋我軍伏也沿途居民爲
賊殘破滿目脩然意惻惻不自禁所至見大夫士下及
居民行商言兵部侍郎馬中錫奉

命統大軍顧陰護賊語其謬逆異甚亦不能勝舉但笑
且罵賊初甚微所過土豪往往能逐殺之自馬之至軍
民皆怒視莫敢動賊由是遂滋蔓不可制以至於禍天
下厯

天子憂鳴戲朝廷用人其惡可輕也大抵今天下觀人

者見有可小知輒大信之卒用是悞事四日辛亥至德州先是賊禍既烈調邊兵獨延綏未至至是皆會殺賊衆千餘人巡撫邊蕭二都憲來訪言賊方散去南行無害兵部侍郎陸公時統大軍駐德州一見訝曰何爲至於此慎哉彌山東皆盜也予賀曰喜方有捷音曰未也尚不能十之一予心喜曰善哉可以平賊矣縉紳士相會者咸戒勿行有鄉人南來言楊虎潰兵途中逢至數四明日乃宿留焉是日延綏兵獻俘陸公見所斂還婦女爲之痛心薄暮克中赴山東別去予以大軍環德州而大而楊虎方潰破其他鼯鼠勢必南去耳欲姑至臨

清觀型遂以次日行九日丙辰至臨清聞賊於前數日
大掠濟寧焚漕舟二千艘乃復留一日而聞有一二官
舟方啓行而邊將率二千人南下可扈以行明日戊午
行至東昌訛言屢騰謂勅寇方復至十二日巳未舟膠
荊門聞下十四日辛酉過開河感亡兄一慟夜至濟寧
時寇新退遠邇悚息舟舶無行者十六日癸亥偕刑部
張主事 出濟寧灰燼滿河河水咸黑焚骸斷纜夾
流而下米積河中若沙亂流而取者以萬計舟檣焚燬
槎枒若劒戟若峭石填塞數十里水臭穢不可食自沛
以上過魯橋望孔顏閔子之邦爲之慨然日暮未至棗

林數里舟益艱不前命百餘人以大纜撥廢舟夜深過棗林閘水復駛悍主事君舟幾壞焉十六日乙丑過徐州管河謝郎中汝正輩數公來會復皆訝曰不見北來士夫旬月于此矣十九日丙寅過徐州洪阻風雨主事君後候之不至二十日丁卯過呂梁洪

松臯書屋記

靈寶據洛陽勝處中條峙其北秦嶺橫其南黃河遶中條之麓而弘農澗映帶其西面澗而壁大者曰東崖冢宰許公大精舍其下而雜蒔花木以爲游息之區公旣逝其子方伯先生廷美於舍傍築室數楹讀書其中先

公所植花卉日繁以滋森秀翳鬱條然成趣而松柏獨
昂聳其間壯山河輝雲物遏截氷雪淙滌煩暑卽之使
人心目豁爽盤旋而不厭先生乃題其室曰松臯書屋
因以自號謂未有記文走使來請予昔在史局及仕西
梁皆從先生後間嘗兩告家居而先生適官于浙蓋炙
德之日久矣爲之記曰夫松植根固而取精多培溉滋
養數十百年無剪伐摧剝之患而後其材始大東厓公
歷事

累朝茂烈豐勲非一日之積也而先生于時朝夕左右
受經術如韋玄成習典故如黃瓊襲清白如楊秉封植

久而滋息深駸駸乎日盛其質茂而實其性通而理其
於恒材也不類予於內外臺見其崢嶸岿勁挺而肅
穆也風聲之清且遠也於翰林見其文之華秀晶熒竦
厲詰盤而敷腴暢達也於造士見其有本有文成德達
材一以漸而不苟也於浙藩見其綜理之微縻履之密
膏液之淪浹而屏翰之壯固也雖茲鬱鬱一方而巨幹
危標固已喬腴爲天下望叅烟霄肩廊廟夫誰得而禦
之靈寶之松其諸爲魏州之槐乎然方晉公植槐在擯
廢不得意之秋魏公出而成之奕葉重休已不能許氏
若矣雖祥符功業巍巍乎不可復尚而天書之奉亦奚

管寸朽之累哉先生秉衡運樞固其傳家之恒物而貞
固之德克繩前人者亦既徵往昔而無悔矣盖方奸倖
之弄權也坎廪摧頽冰霜霰雪交下而不可支而獨處
之屹然如大木之撼於蚍蜉而曾不少動於此見節槩
爲何如而又奚患乎清平之日耶夫松也槐也並茂於
發育之天而不凋之節槐固有時乎不能及是物性之
固然而可以豫卜於悠久也知先生者或將首肯於斯
言

永思堂記

吾母舅元博沈君嘗受學吾父太史公予嘗方垂髫得

同硯席者數年君視予蓋七年以長而端默慎重不妄
言笑書卷終日不去手夜誦率達旦毅然有亢宗揚名
之志旣而屢試弗售先邇菴翁復捐養元博君每悒悒
不自得竭誠喪祭忌日必哭泣盡哀其孝思之心遠而
彌篤蓋如此嘗謂予曰我父以純孝勤儉貽訓後人吾
惟弗克堪焉是懼今也年越知非髮且種種不能光照
先訓以自副其平生於心恒介介焉顧所承藉於前人
田廬方策未之或墜且幸有增拓今使諸子肆力耕讀
以無忘箕裘庶幾其將有望於他日乎乃題其堂曰永
思而命予爲記竊嘗觀之人孰善曰恩恩孰大曰親夫

親身之本也思親不忘本之謂也其本之忘不忘而枝
柯之榮悴隨之不然蹶其根日護其枝雖欲繁昌得乎
哉是故思百骸廢形稟於吾親也則凡正衣冠肅容止
尊視聽審語言不敢不力焉思宗黨姻戚屬於吾親也
則凡崇禮讓洽恩愛救患卹無敬寡屬婦不敢不力焉
履田宅思締造之艱親手澤思教迪之志則凡恪勤夙
夜以圖光啓夫基緒不敢不力焉夫如是在德日崇在
業日廣所謂九宗揚名何所不至百世守之百世之休
也而奚覆亡之患之有今夫故家鉅族何處無之其一
旦蕩而爲墟必子孫之弗能思耳君五十而不忘孝思

其於燕翼貽謀可不謂善之善者耶夫如是雖不假尺
寸猶將日見其昌熾况新堂構闢疆畝以資之乎詩曰
如松柏之茂無不爾或承蓋篤於本者之謂也沈自吳
徙越門閥最舊宋元間多宦達諱中大者與紫陽朱子
同年進士詩禮相沿迄數百年于茲而元博君尤以沉
厚文雅稱于鄉自予侍硯席于今三十年而舊學弗懈
每相見不爲詭言激論懇懇焉惟本實之不忘吾外氏
之奕休其君實賴焉故爲之記以勵乃後之人

約齋記

休寧汪翁庸夫於旗山之右得宋學士程公秘之遺趾

樂室其上以爲遊觀之所石鼓天馬鳥龍諸山與旗山
四面環拱形勢最名勝而庸夫儉素自守尚義敦行超
然塵紛之外題其室曰約齋因以自號縉紳之士聞而
咏歌者若干人其子繼芳請記於甬川子且曰願有以
怡吾親者甬川子曰善哉翁之名齋也今夫駢拇枝指
恒愧於夫人蜺愧夔夔愧蛇蛇愧風形有多寡而用無
優劣然且多者猶見嗤焉况夫以多事病者乎曰何謂
以多事病曰多蔽厚亡多智速斃多言數窮是故蝨蝨
不百武而躋狸性巧捷十倍乎慶忌而網罟及之韓非
蘇秦公孫龍之徒皆卒窮於口曰然則寡蔽寡智寡言

其可乎然其如困何曰晏嬰之儉高允之不欺絳侯張
相如之木訥皆名振而身亨奚其困雖然寡之約未若
無之之約也曰請問其方曰有人有天聖人因人欲之
不可窮也而天以節之置吾人檢匱之中而不得肆如
逸馬之受絡如萬絲之受束及乎人氓天居其於外也
如樞運而不相薄儼乎恪澹乎漠油油乎與伏羲允遠
相前卻而物莫之鑠夫是之謂天下之至約曰旨哉言
乎請問其原曰變化云爲萬殊而動息之機一萬物皆
出於一皆入於一吾稽其萬以得其一易知簡能皆於
我乎出約乎約乎乃天下之大術繼芳聞之恍然若有

失也歸以告約齋翁翁怡然若有得也歎曰用川子之言孟軻不如

雲川記

雲川翁者鄞人楊姓家世以文學功業著公獨隱弗仕質而弗俚通而弗詭恬然絕希世意世亦無求之者然見其子克耒字國祚者端且慧則令業進士將嗣其家聲嘗游雲川而樂之因以自號時人莫之識也唯用川子識之一日相與泛舟雲川之上命其子侍酒酒酣翁扣舷而歌歌曰川澹澹其焉逝兮雲漠漠而覆之固澹漠其相遭兮嗟予去此其疇依有頃川忽騰氣爲雲雲

亦雨而爲川少焉復霽雲影川光飄焉搖焉如追如隨
如娛如嬉甬川子俛仰其間泊乎欲忘歸也引國祚前
而歌曰天之澤兮匪雲弗施地之澤兮匪川弗滋雲於
川兮孰爲期澹無心兮百物宜長澤人兮人不知歌未
竟魚出若聽鳥鳴若應國祚曰旨哉先生之言乎夫感
通於無心功成而不自德是天地之所紐也萬物之所
宗也伯禹傳說之所優爲而來也何足以知之甬川子
曰翁之志無亦期若於斯乎對曰然乃爲之記

東野圖記

客有善東野子者携圖而過甬川子爲之請記焉曰東

野子姜姓字曰廷輔家慈溪之東野脩篁白石條然幽
趣畊稼畜牧賞適謳吟率不出東埜雖出無幾輒反人
恒遇其東埜游也呼之曰東埜子東埜子雖簞笑與居
而名縉紳常踵接其室或相與談古今事若火阜珠林
錙銖異燿時乎平疇交風良苗懷新則幅巾逍遙染翰
賦詩年六十氣益勁神益爽親友好其人嘉其所居即
而圖之有魏埜氏之風其埜鶴竹石皆清以致遠爲東
埜子之所好故以表其風致亦因以壽焉甬川子曰有
是哉東埜子之善處約也雖然昔孟東埜以工詩名當
代爲昌黎公所愛重然方其未遇作詩曰出門卽有礙

孰云天地寬及一日舉進士即快然有春風得意之句
識者嗤之夫今之東野無亦昔之東野乎哉客曰東野
子之志孟郊弗如夫困而弗爲戚必也通亦弗爲喜予
昔見其放鶴而歌歌曰皎皎白鶴兮其飛戾天維彼浮
雲兮與之超然又擊竹而歌曰燐彼春華兮條榮以悴
微子之貞兮疇與卒歲歌已散帙鼓琴陶陶如也雖困
何嘗爲郊也戚哉甬川子曰有是哉東野子之善自娛
也雖然昔人有言定乎内外之分辨乎榮辱之境聲詩
琴書之屬假而寓吾情焉非所賴而勝乎外也今夫物
惡在而非天天惡在而非我宇宙之間屈信萬變而分

定吾內者常弗與焉苟盡吾分則金革百萬與飲水曲肱均之無一事身惡乎倚而有通礙意惡乎存而有失得他日客歸以告東野子東野子莞爾而笑曰有是哉

東野子之志也

東軒記

吾家父構軒於槎湖之東墅命之曰東軒大僅容膝高可二仞東顧沃壤數千頃金峨雪竇太白諸峰遙聳其外山嵐海氣日夕浮榮宇蓋俗士鄙其居之隘而達人樂其景之舒壬申之歲三月朏日升于東有習其風家君偕叔父集宴于軒中誦崇禔之遺風想舞雩之詠歎

雍雍如也怡怡如也酒半家君言曰曠哉茲軒之境也
今夫鳴者躍者飛者繁華者鬱而秀者孰非東皇之化
育乎芬芬欣欣吾與之俱春于胥樂兮仲父舉觥而進
曰太和之氣寔和且粹是鍾于物同生異類和樂且孺
孰如我兄弟季父作而曰於戲維我先人種德秉義越
今十世吾二兄之言友于家同于物嗣前德也予雖蒙
敢不敬夙夜求無忝于昔之人邦竒進曰廣哉言乎稱
天之生稱地之情稱茲軒之名易不云乎帝出乎震震
東方之卦也是其在天曰元在時曰春在人曰仁仁德
之首也友于家同于物嗣于厥先不亦仁乎仁以浚天

不亦廣乎孟子曰居无下之廣居其是之謂乎又孰知
茲軒之隘也與于時父叔歡甚春盎座席之間舉酒相
屬而命邦奇作歌歌曰東日之耀兮照我顏之膏兮庶
類是壽兮而以同吾好兮家君曰記今日之言訓諸後
邦奇遂謹書之季父字曰維德因以東軒號云

觀瀾圖記

客有好觀瀾者延佇乎危梁之上久之恍若見人焉問
曰誰也其人慨然若應曰予河伯也曰何以來曰吾疑
子之觀我之久也天下之靡曼修姱紛麗而妖艷者人
爭先覩之涉吾波者多矣目未有一眴者焉子之耳目

獨異乎人哉而樂吾之無色也客聞之纓纓綿綿頽然
如不欲言已而曰吾泊乎不足枵乎無欲杳乎浩乎而
不知所尋逐顧獨樂子之類我也蓋彌天舉地非汝之
大一勺之內非汝之小先萬物生而不爲壽朝盈夕除
而不爲夭其來也非盡其往也非徂曲者不以鈎直者
不以繩遇濁而濁遇清而清吾庸知夫清之非濁乎濁
之非清乎聽之有聲挹之無情視之有物執之無質吾
庸知夫有之非無乎無之非有乎吾誠樂而觀之河伯
憮然爲間曰噫嘻亦太甚矣吾子之誕也子何足以知
我哉乃悠悠然去而歌曰至靜而動兮至實而虛至柔

而剛兮至儉而夷形氣之間兮厥妙可窺太初吾體兮
人誰我知本根浩大兮派別者支小大有分兮去來惟
時清吾本質兮物則滓之混混無窮兮逝者如斯聖吾
合德兮賢其我師荒唐罔象兮去道遠而客聞之咯焉
而吁然終莫能悟嘗聞楚客有莊周者樂水常好遊濠
梁之上今所傳客意者其周乎一日覽觀濶圖以其事
告從父東軒先生先生遂命予書于圖之上方

戴秉誠先生遷居記

吾友汪汝誠有識鑒少許可然常亟稱秉誠戴先生之
爲人其信曰吾十六七時受學於秉誠先生先生年可

三十餘貌甚莊氣甚和動止甚矩度好讀書勤而能精思形之言議雖時或執之過然就其所見可謂深且微矣時所業不過時文而能不屑屑焉每廸予古人之道嘗一夕俱遊翠山之西吾問之曰世所傳廣寒宮者焉是先生俛仰四顧答曰今茲涼月麗空輝散八紘之間舍是吾安求所謂廣寒宮者邪吾聞而樂之至于今思其言不忘予曰有是哉先生之知樂也夫至樂不在天壤之間乎見之弗知名曰盲聞之弗知名曰聾盲聾之徒烏可與言樂君子之言也不下滯而道存道之所存樂之所存也而曾不下於帶焉况於代明而日月變動

而風雲流峙而山川飛鳴上下蕃秀舒結而鳥獸蟲魚
草木孰主張是孰綱維是是非可玩而樂者耶詩不云
乎泌之洋洋可以樂飢泌人之所共見者也饑人情之
所甚不堪者也君子獨以泌而樂饑不已異乎今天下
委瑣渙泥沈溺淫湎於利欲之場以至於老且死而莫
之悔者固不足論間有知超外聲利者又或妄意於飛
昇惟誕之事凡皆所謂日用不知有龔之徒耳不然知
動之靜知顯之微知常之奇樂之且不得暇而暇求他
爲汝誠曰旨矣吾子之言卒未之歲予歸自京師明年
先生適遷居桮橋之西其地僻而陋其居環堵蕭然曾

不蔽風日而先生方恬有之人咸以爲惟莊生有言西
施毛嬙人之所悅也魚見之深入鳥見之高飛人物之
所避就其異如此知愚之相違不亦有類是者乎吾於
是益知先生而信汝成之言汝成嘗約予築蘇陂靜觀
萬物之理迄今數年猶未遂姑將與先生弄月於烟水
之鄉故爲之記以表其志云

西疇軒記

昔西疇梁先生淳厚而文望重于鄉暨其族子友蘭先
生我大父東臯先生皆畜德弗售日以詩酒相娛當是
時自畿甸達于海表民物晏然無寇攘之虞諸先生從

登錫爵之餘發爲詩歌金春而王應相與鳴盛治於罍
湖之濱而接高風於箕山之側其事不亦休乎其樂不
亦盛乎先生逝矣而西疇之軒固在登茲軒也先生之
風猶若洒然於庭楸籬菊之間而况有子如文和公者
灑散而樂易簡質而慈柔恬然自適於塵務之外而曾
不以累於其中親賓時至笑語款款必盡歡而後已足
非有以繼先生之風者乎公予祖母舅也自吾祖之交
西疇先生歡娛燕集于茲軒者凡三世于茲而公亦老
矣於以見

國家久安長治之休而古人所謂百年昇平不爲不遇

者公今其庶幾矣夫然予有憂焉自儉覓肆毒民不聊
生萑苻之擾紛然遍天下今雖漸次剪除而治極防亂
古人所慎不知

今日廊廟之上亦有憂懷及此者乎如有之吾將與天
下父老樂昇平於無窮獨公也哉予備官

禁近輟侍從之勤歸省于家幸獲侍公言咲於江湖之
遠而重有感于廟堂之憂也於是乎書

清文軒記

予嘗稱桃浦王公之善取友也客聞而諮焉曰何如予
曰王公居桃浦足跡未嘗越鄉郡得一大延至其家居

之軒之前與之周旋終其身其友甚盛德不與俗類客
曰其德奈何曰吾觀其外標格甚古風神甚秀異然有
本焉非虛飾故人亦重之衆方閭妖妍爭紛艷獨羞與
伍去華尚實黜然質也及世運變衰殺氣凜凜逼人肌
骨乃勵節操逞顏色霜巖凍谷居之裕如見諸弱植者
改容喪氣憔悴漢落則爲之粲然而笑遇風辰歡甚或
起而翔舞灑如也其歛而就實也則風味益遠而善和
物物或困於苦辛遇焉無不濟者尤神其術使人思之
雖甚渴即止其先生自邃古有巢氏之世人多依焉然
微而未顯殷相傳說用其道天下太和至嘉之錫之伯

爵世其傳後爲糾所醢然族姓日益蕃其在江南尤盛
能以夏月興雲雨潤百物功德無比或嘗夢睹羅浮疑
其爲神僊自是騷人墨客爭譽以詞賦累億萬言然莫
能極其妙宋之昔生孤山者與林逋友善今其裔孫落
魄無憂者而王公獨與爲忘形交旦夕不事言說相與
以意氣雖箕倨其前偃卧其側弗較也對之清興逸發
不能自禁就其旁鼓琴吹簫聲韵益遠若有神助嘗中
夜獨寤明月麗空四壁清絕瘦影闐然自軒櫺而入公
見之亦不爲起卧而曰自吾得子寃夢皆清今正思子
子果爲我來邪依依然漸徙而前達旦乃退尤好弄月

吟風微風微唱大風大唱其聲穆然而清公和之則不
勝其悅爲之點頭不已歲時伏臈公置酒宴賓終日在
前勺飲不入口公恠之問曰嘗聞古者唯玄酒之尚吾
子慕古道得無嗜玄酒乎命取而灌之則不問多少盡
吸之座客或大醉頽然不能出門忽張目視之見其容
色驚曰是何王人來也不覺遂醒以其得天地之至清
命之曰清友云或問公曰吾觀子之友形狀色笑皆不
汝類子何好之深乎公應曰子未知友道邪傳不云友
也者友其德也夫德苟吾類吾庸知其他且今形相附
聲相和者固云類也迹類而心則違焉奚其類奚其類

及公以壽終或欲去之公之子有能世其德者故卒留
不去今半骨日老且瘦獨精采如故年甚高能折軍行
與公之子友然公之子以丈人行視之曰鉞者即廷威
先生予父友又辱姻焉予故嘗登其軒見其清友者是
以知其詳客曰嗟乎王氏有友如此夫安得不超俗乎
予曰然遂爲之記

貽安堂記

萼湖龔公自幼習舉子遊庠校幾二十年名聲著鄉邑
已而竟弗偶休休然無愠色嘗喟然曰古者世際亨嘉
賢良彙進間亦有隱其德弗耀者吾獨於今也何求詩

不云稼穡維寶代食維好其是之謂乎且吾祖先以耕
讀世吾家遺及於吾有屋數楹書數百卷田數十畝是
豈不足以終吾身矣哉使吾子若孫皆若吾之承吾先
也其何安如之乃顏其堂曰遺安陶陶然樂也春而課
耕秋而課穫暇而飲酒賦詩烟花雪月之晨召賓客投
壺鼓琴從容宴笑或竟日而罷以其所自爲者教其子
若孫無休外慕予聞而嘆曰不亦善乎寧湖公之遺其
後也知安之爲安今夫人之愛其器者必于其地之安
也厝至其子孫而遺之危何哉孔子曰愛之能勿勞乎
人徒知佚之爲安而不知勞之致安也是故馳騫聲利

營營朝夕其爲後人計者飛薨華槨以安其居也輿馬
僕御以安其出也豐藏厚蓄百用畢致使無他顧憂以
安其心也自顧所爲傲然以謂不拔之基而不知知者
視之已若見其跼足於焦原之上矣幸其身也或免其
子孫驕奢淫佚卒以速戾是亦誰之遺也乎故昔人以
敝床疏席爲佳趣以櫛風沐雨爲美景是固知安危之
辨者不然子臧之服慶封之車美麗孰加焉乃終以是
亡其身其何危如之老聃管夷吾不愚人也其言曰多
藏必厚亡曰晏安酖毒然則多藏以遺子孫是以厚亡
遺之也晏安以遺子孫是以酖毒遺之也是曾不若勿

遺之愈也而人皆莫之悟覆轍相尋而不知戒悲夫蒼
尊湖公不亦善遺其後哉昔嘗有龐德公乃今復見龔
公公予父友也聞予言甚喜遺書謂予曰子之言予之志
以并遺予後之人不亦可乎予曰可哉故記

遺安堂記

遺安堂者李君壽之之堂也李世居鄞龔湖之涯君爲
人質厚而文精岐黃之術嘗曰吾生無益於時坐食先
世之遺德苟得濟人疾苦少遂愛物之心使不爲虛生
焉足矣益李氏據譜爲宋文靖公裔建炎初避難始自
汴來家焉世皆隱處壽之曾祖諱吉生者以才胥歷督

府掾史有令譽壽以遺安名堂至壽之考潔菴處士游
江湖克裕厥家買田築室爲耕讀計又別創堂構於舊
居之南揭以遺安舊扁命君徙而居焉君復曰吾能守
先世之遺以遺我子孫亦足矣夫遺安云者龐德公之
言也德公甘猷畝而辭官祿故欲以素業遺其後焉耳
若李氏以文靖爲之先則當時位望之巍我功業之炳
煥豈區區隱處者比而以是名堂無乃非先人之意也
乎然吾聞之文靖公身居相位寵榮極矣及其爲子孫
治第不過以太祝奉禮期之則公之無慕乎外可知而
詒謀之善亦豈與德公異也夫人之情逸豫日媮勤勞

日勵斯固安危之大機也而世之人昧焉往往崇墉峻
宮以適其居也僕夫與馬以華其出入也金貝玉帛以
充其用也而不知子孫已中於宴安之鵠壽多藏有厚
亡之虞而高蓋多傾覆之患是果安耶危耶李自徙家
于茲歷數百年無豪華奢之習而休休焉日衍而裕斯非
遭安之明驗歟雖然龐公遭世多事故爲此言使遇清
平之日其能終焉畎畝之間乎夫苟賢而弗驕祿而弗
侈居廟堂而不忘乎山林被文繡而不改乎簞屨處之
以忠敬而行之以仁恕固將使天下皆安而况於身乎
况於子孫乎此固文靖之所以享榮名而光無窮也壽

之席先世之遺誠心濟物德義之美往往推重士大夫
間而爲子若孫又篤慎而華秀安知後世不有食厚報
於天致身蠟廊之上不弘濟物之心而益昌厥宗者乎
予辱君素厚稔知其賢重以鄉黨之請乃推廣龐公之
意而記君之堂以缺夫後人

水北庄記

度邑城南飛雲江而西四十里許曰曹村有大溪蜿蜒
東流入于江湖氏之庄首焉曰水北庄庄四面屬圃石
塘黃林慶雲諸山分奇競秀壤壤鬱鬱若非人所居并
溪而上臺觀掩映長松夾泉日夕有聲民橋其間曰聽

松曰開泉橋北有白箬坑青楓岫色蕉塢愛松嶺嶺之
絕頂曰聖井山又曰許峰相傳許旌陽斬蛟處也九龍
山珠山蜈蚣龍羊眠皮嶺在許峰南皆竒發源于峰墜
於江者曰攬鍾瀆倚峰之下隄而聳大者曰松化石其
東石橋曰浮橋兀百數十洞橫跨澗野通石塘嶺南有
巖據天井洋之上振之其聲填然感風雨曰播鼓石岩
之西焚池朱井白水淙倒流潢羅列禪刹之外而石嶺
盤繞其上曰景福山突兀環聳西來枕焉者曰五官朝
尊山其他幽泉怪石怵心而矚目者尚不能詳其名無
論形勝水北之庄實庵有諸景庄之館曰藏雲軒曰枕

流池曰漾月臺曰坐月其亭曰松亭即主人號也主人
姓曰胡名曰晟字曰孔陽嘗離庄北游京師著魚失淵
園圖焉不能頃刻忘每爲予道其勝槩予聞而樂焉輒
曰當爲君記未幾胡君上疏去予乃思夫庄之山水奇
勝甲天下然而幽且僻如此夫固以待隱者胡君之歸
志隱也而隱者弗耀胡君居京師二十年名聞士大夫
山水之勝已往往爲人所吟詠今予復益以文縱胡君
弗拒山靈其予哂哉是故略述其槩使遊者知所指尋
焉耳

貞節堂記

應氏僊居舊族序六處士個儻嚴重爲鄉人所賢已而
早世而其配陳氏孺人能完節以老郡縣上其事

詔旌其門曰貞節而堂因以名嗚呼古稱女惟一德順
也貞節云者從一而終亦順之義然難易遠矣今吾聞
孺人事則固備衆德以全其所謂一德者於乎其父難
矣始處士沒遺田二頃宗族有利之者諷孺人再適不
從加凌侮以撼之又不可奪則托以徯役賦稅日朘月
削弗較也惟辛苦事織紉遣子游鄉塾暮歸手執業課
之讀書孝經論語小學諸書大義爲之講解至夜分以
爲常常歲飢孺人視其倉困囊頽慨然曰茲禍本也遂

悉揮散之而睥睨者止詩曰哲夫成城哲婦傾城孺人之哲哲而丈夫者也而惡可少哉家既益寡處士故所遺馬又無所於用或者曰盡售諸孺人曰吾夫子之所愛也吾忍乎哉終不失惟蓋之義聞者歎曰於其馬也猶愛及之彼寧忘其天也乎蓋自是搖撼者益息矣甘苦樂澹周思備飭以卒完乃節以植乃家以光乃宗族以茂乃後壽八十有八卒之日家人問遺言曰吾親見吾子孫皆能樹大死報吾夫墓下不愧矣子男三人覃旭昌皆賢其孫亦繁且異曰良今爲翰林庶吉士溫毅明亮勵志於道應氏之隆其未有艾也予與吉士君同

舉於鄉雅以道契嘗爲予道孺人事予惟孺人之節朝廷旌之天下聞之矣顧其德義之詳久則或罔聞焉因謹書之以記諸其堂使應氏子孫世世知所以克隆者有自也

梅竹齋記

岷王好觀物理樂幽靖於府治之傍列植梅竹而構屋其間命之曰梅竹齋夫群卉之生芬芳藹然孰非可玩而樂者而求其清真秀異翛然出於埃壒望之使人神澄而氣爽者惟梅竹爲最若夫玉質氷肌闢發生意不言而氣臭潛孚探之則精蘊無旣是竹不如梅停碧浮

翠刷垢爬塵炎威迴避洹寒莫侵中通外直節介凜然
而不可犯是梅不如竹當夫火雲歛迹明月麗空王於
斯皆引酒以酌清影沉尊佳實解酲故飲而不亂昔雨
旣收涼颼颯然王於斯皆援桐鼓之幽興逸發商聲滿
林曲奏旣終餘音鏘鏘若或爲和王曰是所謂天籟者
聽而樂之玄冬閨景霰雪交加百卉具零元莖枵然斯
皆也清馨襲人勁氣凌物王乃登雪峰舒嘯而長吟氣
格超凡音聲絕俗迨逼陶韋之蹤而欲駕軼之者是梅
竹之助之也夫人極富貴則妖麗穠郁日以昏酣而莫
復知夫物理之真邇吾王所處其富貴蓋已極夫人臣

而顧惟梅竹是好幽靖是處則王之識趣爲如何而凡
世之沉淪而荒迷者舉不足以投王之好而移其心斷
可知矣夫天下之味莫深於物理而樂莫大於無待於
外而自得王能得之是惡可以無記

來軒記

湖廣左方伯周先生築軒於脩江之上號曰來軒先生
以鳳名公儀字取書鳳凰來儀者義也鳳之爲祥昭昭
也來則三光平年穀登明良相成物熙以雍故天下幸
之至德莫如舜至樂莫如韶鳳凰來儀徵其和也旣其
變也鳴鳥不聞於是乎毀室以忌鴟莫黑以惡烏均是

物也或來而喜或來而惡祥不祥之異耳漢有謠曰廉
叔度來何暮幸其來而恨其暮也若夫距脫之歌眼釘
之喻則惟恐其去之不早矣均是人也或幸其來或幸
其去仁不仁之異耳書不云乎厥脩乃來來德也孰不
好德然鮮克來之求弗力也如有能來之者則天下皆
幸見其人焉此先生之志也而名軒之義著矣先生來
旬來宣于楚邦楚邦之民欣欣然已而戚然如恨其暮
也吾既見之矣然其于閩于蜀于滇南吾未見其人之
幸其來也而聞其人之惜其去也其去滇南也滇南之
人士贈之言若干卷去蜀蜀人贈之去閩閩人贈之皆

頌其德政而惜其去其去也惜則方其來也而幸可知
已矣今方蘇枯而振窮覃仁澤於楚楚民咨曰公得無
去我乎召命將至予曰未也

先皇帝隆磨虞之治作大韶之樂先生當其時也以麟
經擢高第鳴聲聞天下天下胥慶以爲瑞于今垂三十
年係于一方其如天下何召命而至先生固將羽儀於
天朝夫文明之化由天朝而施于四方四方之俗其有
不均被者乎則於若土雖去猶來也若何患焉遂以爲
來軒記

金玉珠璣世之所謂寶也產於殊域絕礦深淵之中其勢常不易得而人往往百方求之善之在人其欲得之不過一念慮間而莫有求者焉豈以善爲不足寶歟吾嘗觀之觀美之眩目也玩物之蠱心也奇麗之啓釁也則夫寶珠王者是甘鴆而嗜毒也不特無益其身而已而善何負於人哉保之身安施之人悅推而達之鳥獸魚鼈咸若精光氣焰豈特珠璣金璧然哉柰之何是之弗珍而求彼爲也予自筮仕出入姑蘇於今二十年蘇民之俗怙侈而競麗獨王君獻之者不然冲淡而樂易讀書守禮恬焉無所怵於俗承其先質菴翁之清素以

淑其子姓長幼卑尊雍雍而齊肅內外之言不踰其梱
四方之賢達過其地多主於其家罄吾四明之士無弗
交且厚焉獻之篤好善之誠不出鄉邑而友善士於天
下極天下之嘉言懿行無弗聞且見焉則天下之寶固
咸萃於獻之之堂岷岡荆麓南海之淵不足以喻其富
行將慎取而篤行之以盡復其所固有天且與我合德
又何金壁之屬之足云哉且金壁珠璣人或固腐鏹以
守而喪於胠篋攘於晝勢蕩散於驕奢之子孫求之天
下亦有一再傳者乎今夫善盜蹠弗能取趙孟不能奪
積而傳之垂裕百世楚書曰惟善以爲寶其是之謂乎

予交獻之既久稔知其所好獻之兄子曰精勤而英達其子曰皆端秀而敏慧過而見者咸曰是王氏之寶也善王成之有不爲宗廟光乎請記其堂以俟

孝享堂記

古之致孝享者于廟不干墓然出入展墓周已有之省視之節拜掃之儀皆人情之所不容已而雨露星霜怵惕悽愴之心則於墟墓之間尤切焉此墓祭之所由起而享堂之不可以無作也亞叅慈溪裴公壤旣塋厥考贈工部員外郎穀遺先生暨厥妣封太宜人梁氏衣衾棺槨塋域之屬旣厚旣堅凡制所得爲石獸望柱誥命

之亭表誌之碑旣美旣度乃于墓之南百武許構室五
間中曰孝享之堂左右則齋戒之所庖湆之屬皆在焉
歲時以婦子宗姓薦享于堂而省視則未嘗虛旬先太
宜人予王母姨也故公徃徃率予以省墓入其門花卉
竹樹森聳而方列肅然若有所聞登其堂几牖簷楹幽
邃靖嘉優然如有所見予因念少而偕計于京師假館
于公之第太宜人亦就養焉公食必問所欲不遠百里
而致其所嗜已而送予南歸以穀遺先生迎弗果來爲
之南向垂涕公于時年五十餘矣而猶不改嬰兒之慕
焉則其于親沒之後垂白之年而拳拳致孝如此非天

性固異也哉夫廟而致死之墓而致生之則先儒以爲
不智公旣致孝於廟而施及封塋之間夫誰曰不可且
魂氣之無不之也隨所求而皆得况夫體魄所藏孝子
慈孫皆省月謁之地安知神之不眷眷於斯也而可以
或忽乎孔子言孝不過生事葬祭以禮曾子曰慎終追
遠民德歸厚孟子曰創業垂統爲可繼也若公所爲固
足爲鄉邦式况爲子若孫者庸可以無繼乎邦奇不佞
請承公命記公之志以示于無窮

東麓記

毘陵郡治東數十里有山曰孤塵北枕大江浩渺無際

其南則靖江崇明隱隱在望江海之交吳之最勝處也
山之來也西南自五嶺衡廬東南自武夷天台綿延迤
邐不絕如綫轉東而爲金陵之鍾蔣潤之北固又東而
爲丹陽之嘉山已而斬然下截爲平地然其脉潛行地
下數里突然起爲抵塵而東際於江若海諸山之脉於
是焉窮故以東南諸山言之則抵塵乃天壤間一大東
麓也以抵塵一山言之則山之東亦一小東麓也惲公
功甫與予同官湖南時每爲予道其勝且曰夫造物者
佚我恒於斯息我恒於斯乃去其晉齋號號東麓焉山
之石諸岫累累迴環內向東北距河二里巍然而起廣

可三畝曰黃山嘗得石碣題曰漢梁王相國惲子冬之墓故惲譜推子冬爲始祖山轉而南又五里爲九龍山相傳晉唐以來惲氏族塋處公之祖孟忠府君考贈承德郎存省府君妣謝安人之墓在孤塵之西繼母陳兄聽秋處士之墓在其南阿而山之東背則公配蕭安人塋焉且用爲百歲合歸之室蓋公所謂息我於斯者以此爲亭于山之陰以睺清流爲堂于山之陽以挹颯爽復干麓爲池方數百尺可釣可相環麓上下時松數千章蒼翠彌連風濤鶴唳可觀可聽蓋所謂佚我於斯者以此嘗命工繪爲圖公餘則揭之堂壁以寓神騁懷

因命予記之久未有以就也越二年公乃克遂歸志而
予亦以親老終鮮歸休乎甬江之上念與公登黃鶴之
樓浮觀漢沔歷襄樊而陟武當之巔可謂極天下之奇
飲酒賦詩窮人生之樂而縻職簿書猶徃徃有遺興焉
以爲憾今幸俱脫羈銜夢想東麓恍然如墮森沉杳靄
間也故遂據所聞以爲之記若夫烟雲卉木寒暑異觀
疊嶂洪濶晦明殊態未可勝紀者如獲從公遊雖不文
尚能爲公賦之

張文定公靡悔軒集卷之三

記十五首

永慕堂記

孫吾鄴名族大美君者鄉善人也君之尊人曰懃菴儉
素介直有汲長孺之風旣竭力以新堂甃不敢忘先世
之遺德乃名其堂曰永慕以示子若孫懃菴沒十有
年而君以名堂之義請記于予予按家乘孫故閩人宋
樞密固其祖也其後避難徙居姑蘇之長亭里族聚甚
殷至諱庸臣者爲泰州守孫三人曰德六處士者徙居
鄞碧湖之東世守農業逮君六世祖清遠先生敏達有

文仕爲閔州判高祖存心處士容貌魁傑善詞章爲鄉
閭所推重祖西莊處士克嗣家學一時名公多與之交
有遺稿若干卷夫孫氏在宋爲名臣旣而間關險阻離
散分析而其寓派于碧湖之東者綿綿焉絕一線之寄
歷數十年始克以文事鳴于鄉以漸復先世之業而昌
大厥宗此懃菴所爲永慕而不能忘也夫人情孰不有
慕然休於外誘而莫或知其所重寶王太子有時而不
能守而况能慕夫先世之德乎夫苟以先世積累之難
慕而不忘則所以淬礪其身心而周旋于承先啓後之
圖者容有懈也哉去美君以勤儉裕其家以義方淑其

于豈非日炙蕙菴而善繼焉者耶繼今以往爲子孫者
益篤不忘強學而力行厚積而博發吾見孫氏之宗日
昌而光復樞密公之聲華將於是乎在

集義堂記

東郊辛翁越之隱君子也正德己巳冬構堂于祖居之
東北顏曰集義客有過而疑焉問曰世之所謂善治其
家者吾聞之矣蚤夜以思惟宮室之未善也園田之未
廣也貨貝器物之未充且美也汲汲焉圖以集之夫是
以裕其身以及其後今吾子屋不過數楹田不登數頃
績學弗售條然隱處於林泉之間而徒欲紹孟氏之遺

風無乃膠於古不通於今崇虛名而寡實用乎翁曰不然吾亦驗之吾心而已矣蓋一事之或愆也一話言之或謬也即吾心歉然而愧四體不勞而病矣方是時也乘軒戴冕孰知其樂金皮帛孰知其富吾由是而知孟氏之言之信也吾豈徒膠於古耶且夫天吾所從生而人吾所與群而處也吾亦揆之天理揆之人情而已矣命賦於物其則粲然而不昧情露於外其好惡犁然而不可拂兀譴尤集於外而悔吝交於中庸非吾之自取乎故吾自念慮而云爲也自居室而鄉邦也自饋養而蒸嘗也無往而不求合乎義焉庶幾乎不愧於天不

忤於人心安而氣不爲病吾求如是焉足矣且必有配
天地之德而後有以質天地之化有塞天地之氣而後
可以語參天地之功吾病弗能耳吾苟能之則彼弊弊
焉以形骸之養爲事者譬則雞豕之營營耳豈徒崇虛
名耶他日客來甬東以其言告甬川子甬川子聞而善
之遂爲之記李氏慈溪大族翁鐔名時靖字堂背雜植
花卉暇則吟咏其間以自適足跡未嘗至城市誨其子
必以道義曰浙邑庠生有文行將大翁之施曰沾業畊
讀云

賓賜堂記

士之德足以長民翊世畜而弗售而施諸其後昆者斑
斑史冊間可以徵天道也何以翊世曰忠何以移忠曰
孝仁孝之德猶天地之元乎元氣運而化工昭仁孝積
而德施溥理也應氏慈溪冠族菊坡先生者尤篤孝敬
事其親未嘗忤顏色雖捐養歲久一言及之輒噫嗚流
涕嘗建堂東面顏曰賓賜別爲軒西面顏曰停暉以寓
愛日之意停暉軒大夫士歌咏備矣而賓賜堂未有記
者其孫節推君坡每以爲言予生晚弗及見先生側聞
吾表伯父西江表公與吾父洞雲公稱先生賢不置蓋
先生諱簡字居敬偉貌豐髯溫良博愛言動衣冠雍容

詳雅恩愛洽於比隣而忿戾不形於聲氣登庭則花卉
幽清入室而圖書序列聆其聲咳誦其詩歌使人宣暢
鬱湮而不知寵榮富勢爲何物晚年屢主鄉燕譽望日
崇時人以其內行淳飭而表正鄉閭常以方石鵠居陳
太丘云子適菴公亦以清修博雅儀刑一時孫坡以鄉
進士節推瑞州曾孫森森爲梧爲櫟蓋所謂畜久弗售
而將振耀於今日者其勢旣如此詩不云鳳凰鳴矣于
彼高岡梧桐生矣于彼朝陽夫不有愛日之誠而欲爲
朝陽鳴鳳不可也則當時所以篤移忠之地以望厥後
人者固於是乎在而清敏溫文如節推君方昭升其明

德以觀耿光揚大烈而重以曾孫之多才吾見朝陽之
鳳羣階奉婁之地而先生愛日之心將與春暉煦育于
無窮不特區區一家慈孝而已夫謹厚如石氏內史已
不能無愆而太丘孫子亦有慙卿慙長之譏視先生後
人咸繩祖武愈久而盛何如哉予不佞知節推君最深
敢用是記諸其堂以卒先生之志抑以徵天道云

竹村圖記

竹村在故罨湖之東其地僻而遠山水朗秀翠竹清映
梁氏世居焉鄞之族舊而碩梁爲最杠橋湖泊邇其居
者多以梁爲名云今竹村先生者又以德學望於鄉王

邑長髯安行而山大蓋見而知其中之富也予昔與客
造先生之廬先生携酒一壺琴一張書一卷相與坐修
竹之陰歷詩鼓琴迢遙如也予乃嘆曰美哉竹乎直而
有筠特而不予圓不可牽而褻也虛不可撓而屈也宜
烟宜月宜風宜雪殷素夏青王通帝節客曰若是乎竹
之脩德耶先生之好之也固宜蓋自是稱竹村先生焉
他日東原王子者與先生好也爲之繪竹村圖爾川子
曰昔魏桡山居以幽邃聞天子圖而觀焉而桡乃終老
巖穴先生隱約工詩與桡殆類而桡之好竹如先生與
否則吾不知然

皇上求賢如不及愛其廬弗致其人豈今日事哉吾故
因是圖也記疇昔之言將以聞之于

上

祭魚所記

昔李商隱好用故事而疎於記每爲詩文則雜取諸書
散置左右以資考索時人譏之以爲獺祭魚焉予母舅
左菴先生扁其室曰祭魚所蓋好古讀書老而不倦故
借以寓意云耳然先生於先王之制冠昏喪祭儀物度
數與六書之精義前哲之名言博稽而精識蓄之心曾
而發之言議書之筆札見之應用固有所謂得魚忘筌

者何必臨事考索如李商隱之爲乎且夫先聖賢之遺
我以書也人心天命布之方冊使人知篤於本始而推
以及於天下若獺之祭魚則其報本反始根於天性又
不待教而能者而商隱之於書乃不過資以切排偶諧
聲律以爲西崑宗而本始之義固懵然莫之究也則於
輕重本末失其倫次又祭魚者之不如庸詎足以爲先
生况耶先生謂予曰吾沈氏以清白相沿數百年吾所
承于先人惟敝廬遺書在今吾貧且老莫爲後計惟茲
所者願子記之卑子孫知吾好古讀書不忘先人之
心焉則所爲遺後人者亦不爲不富也邦奇歎曰厚哉

先生之心懿哉名居之義乎微而著近而不忘乎遠先生名字字克容晉謂左於世號左菴

尚義堂記

計然富國之策七越用其五而霸范蠡氏用之其家扁舟江湖據都會之地治產積居與晉逐而不責於人十九年之間三致千金再分散與貧交疏昆弟皆人謂之富而行義者也周君良輔越之鄞人個儻有智謀歲游江湖間家貲日裕乃以其先人所遺與已所築之室盡與其異母弟而別創堂構於縣治之西親友嘉之携酒相賀名之曰尚義之堂予觀越地狹而民衆其俗儉嗇

而尚利或者較鎔銖視骨肉休戚如秦人肥瘠恕不爲
顧甚則相爭辨相奪攘終其身若仇讎然而不相假借
者於今何限也若良輔可不謂賢乎雖然猶未也夫所
謂義者純乎天理之宜云爾苟謀利之心一毫或介乎
其間斯非義矣而况孳孳焉者乎且義不可以利言而
利固隨之利不可以害言而害固隨之陶朱公旣致富
其季子以奢縱嬰法乃以百金命仲子營脫焉而冢嗣
請行固而後許公告人曰吾長子與吾更事日久知致
財之難必不能捐百金以全弟也已而果然太史公以
爲智夫陶朱公誠智矣然孰若勿啓其端之愈也方其

顯顯於計然之策其子矚之熟矣財利厚而骨肉薄勢
也是豈詒謀之善乎且天不可以人勝福不可以智徼
禍不可以計免違是三者固難乎其有濟也良輔旣克
友其弟又將舍其平生之務以詩書禮樂誨迺其子姓
而豐約贏縮且置諸度外而不復計爲子姓者亦惟天
理之宜是究是圖而弗計其他當必有施其安富尊榮
之術於

朝廷於天下而光大其門閭者則豈非尚義之明效而
越之風俗不將因良輔而少渝耶姑記其堂以俟

月波樓記

出鄞城西南二十里而遠爲千丈鏡古小江湖處也鏡
水西行數十武爲桺浦桺浦之涯王氏之族聚焉予少
見父叔所爲月波樓詩心慕其勝弱冠奠鴈于王自是
每獲登樓瞻眺而樓之主人質菴翁者瀟洒恬愉超然
物外明月之夕相與稱觴鼓琴軒櫺几席之間澄光接
天塵埃如洗蓋樓瞰水之北涯錫峰西峭而奉江繚其
東南實專一方之景而翁子鍊之君者又別負水而築
脩竹碧流綽有幽趣君訓子有方俾各專其藝弗使荒
墜年邁五十精勤弗懈克裕其家以娛其親質菴翁是
以壽臨大耋而升梯越城輕健如飛君所謂慈孝熱者

非耶昔君從祖鈍菴公之膺冠服也鏡川楊文懿公爲文而賀之其意欲公誨淑子姓以圖輝煥其鄉迄今數十年間讀書明經代不乏人而未有顯者而楊氏自文懿公後科第蟬聯文章功業播之海內垂之竹帛旣極一時之盛雖其先如棲芸梅讀亦得以闡幽隱而蒙休光焉蓋力學之效遠且大如此非鄉邦所目擊者耶矧王與楊也桑梓相接族世相望山川之清淑相際也而一時顯晦顧異若此豈其職誨育者見其先畜而弗售而遂懈其心乎哉不然則今王氏子孫端秀敏慧班班在目豈無可以壽國亢宗副昔賢之期者乎君旣克孝

于親克開于後而予辱姻日久每一登樓而覽江山之
秀於文懿之言未嘗不戚戚于心也辱君不鄙而以記
屬於是乎書

愛日記

何君煒叔明者過予言曰煒生十有九年而先考節菴
府君沒賴母孺人朱勤紡績揚家業以無墜宗祀而兄
又不幸早世今年母壽八十雖飲食尚肯步履無恙而
愛日之心彌甚十一月十一日吾母生日喜懼之集有
不能自勝者予其爲我記之予嘗味晉人仁親爲寶之
言而知天下蓋無足愛者愛身愛家愛民愛物亦愛親

之推也云爾孔子曰父母之年不可不知也夫吾之有生以享年也親與之也吾少而親強吾強而親老矣若之何弗愛之也夫逝者不可以復追也衰者不可以復盛也是故動息不違志意必先以娛其心也心娛則氣和氣和則體康體康則壽益固是故知年者必永其年也詩曰且以喜樂且以永日人情喜樂則日永矣是故愛日者必永其日也叔明之愛日其至矣年饑而養必豐力勤而色不慍形單而親不憂夫養豐愛也勤而不慍敬也形單不憂大也是以親年八十而容色不衰永之也叔明之愛日其至矣何氏櫟陽舊族孺人出蕙江

南宋儒之裔我外王母何出也何故於予爲通家而居
又相近叔明精篆刻嗜文詞相往來翰墨之場又密也
予以親老弟幼輟侍從乞官于湖南近復謝湖南政侍
親于家而親年亦駸駸乎耄矣於叔明之心蓋不言而
喻者記成叔明讀而解頤

一齋記

无垠之火也萬物之夥也生乎其未始有也夫惟實有
而未始有也斯天下之至一也金之堅也或斷之絲之
微也或析之言有形也玉雪之潔也或點之言有色也
存乎其未始有者而天下其孰能二之天地絪縕萬物

化醇男女構精萬物化生是故不致一則天地不得爲
天地萬物不得爲萬物人之心一而已也未始有物也
其二焉者有以雜之故也易曰艮其背不獲其身靜而
一也如有獲焉則甘辛勞佚通塞榮枯得而二之矣行
其庭不見其人動而一也如有見焉則毀譽爭奪向背
低昂得而二之矣是以不獲其身獲其心不見其人見
其道廓平廓渣滓消融醇乎醇精神乎達大哉一心之
爲天地郭一德之爲萬物樞一齋先生豐公進士及第
歷官翰林學士以議禮忤

旨謫戍閩中十年間以書來曰予平生學無所得理欲

雜探近始味周子無欲之旨以一齋自號欲及未死之日圖所進益惟吾子爲發其詳俾終身誦之予作而嘆曰懿哉先生之心乎自伏羲畫乾舜得之爲精一之學伊尹曰克一孔子曰一以貫之其間曰太極曰命曰性曰靜亨一之源也曰敬曰誠曰仁言乎一之實也曰中曰正曰直曰純曰不二不息曰無聲無臭狀乎一之體也故天下莫大乎一而君子莫樂乎能一且天下皆未始有而有故萬有皆無乎有以吾無乎有御天下之有亦焉往而不適耶先生在富貴不驕在夷狄患難不憂亦庶乎能一矣而所以自砥者乃如此懿哉先生之心

平竊嘗伏誦

聖天子敬一之箴而知緝熙敬止之學也而先生方懋
一德于下則雖遠成瘴海而精意感孚終當復合咸有
一德以享天心吾茲有望於今日矣予昔在翰林辱先
生誨愛爲深今也迹遠而心不遠焉發先生之所自得
有不得而辭者且夫心苟二也同室之內九疑橫焉心
苟一曠百世如聚堂室現並生海宇之內哉故記名齋
之義以詔當今而俟後世先生予鄞人始號白菴亦取
靜虛明通之義致一之學非適今日云

知止堂記

定海縣治南三十里地名石湫舊姓朱氏世居焉曰字
清號東洲者承其父靜菴處士之業於所居傍構室數
楹顏其堂曰知止年躋六旬其親友皆嘉其德而喜其
壽請記名堂之義於初度將之予辭至再而育王曉師
稱字清賢弗置固以請乃爲記曰人之生也其豐嗇亨
屯皆有分而不可踰而人之情往往睎高而覲博馳驚
顛迷以終其身而於其分卒不能尺寸踰也斯亦悲矣
字清所居介大海錢湖之間而陽堂玉几瓶壺鄮峰諸
山森列左右爲四明佳勝地其松柏竹箭之茂茶鹽果
實之饒雉兔之肥魚蟹羸蚌之美鳧雁芡葵菱茨之多

平臯沃壤麻麥黍稌之蕃且碩杖於斯丹於斯觴於斯
咏於斯採而食於斯斯亦可以止矣顧其才足以用世
曾弗小試而以淑諸其子曰文彩以才諧從事曰文煥
游郡庠有名子壻三人皆舊族俊子弟顯榮輝煥固當
有不止於今日者而宇清特付之儻來恬焉不以綴於
意可不謂善自顧乎靜菴處士實創室堂名曰懷德而
宇清以知止承之蓋慕乎外未有不遺其內者也則宇
清之篤於孝可知而鄉閭舊故愛且賢之無間言者豈
非其孝友之推也哉且天下之道靜則動止則行大易
艮體輝光而莊生亦云虛室生白福祥止止宇清老且

益康享有多福固其知止一念基之而其日躋月益以振其緒而弘其施者吾又見其無心而自得姑記其堂以慶且竣焉而并示其後之人

兩湖記

兩湖子惟可者予宗叔也方卒業太學而予適爲祭酒間告予曰吾祖槎湖公以明經貢歷修武延平訓導吾父覃湖公舉進士歷官至益府左長史德行文業昭昭在人吾惟不能繼承是懼以兩湖自號以識不忘願吾子廣其義將終身佩之予曰善爲之記曰

四明郡城之西南有湖焉今所稱槎湖者是也或曰嘗

列槎取魚故名或曰爲其密邇大海通潮汐而張氏世居其上故以博望侯所乘得名未之有考也覃深廣也甬水西南行會桃源之水而澄深弘溥曰覃湖者即槎湖也湖非有兩而曰兩湖念祖及父也蓋予觀於湖之水君子之德脩矣坤和澤物仁也淺深必適義也漸而趨卑禮也不測而夷不曜而察智也虛而負重強也動而不禦也乎允旁達信也仁以裕之義以制之禮以和之智以別之強以大之勇以行之信以動之夫如是君子之德脩矣是故善觀水者得師焉師其仁貪悋滅矣師其義流僻滌濫節矣師其禮傲戾消矣師其智猜

惑去矣師其強萎薈之氣振矣師其勇嗔諧慢易之心
激矣師其信機詐誕息矣故君子之脩德也者脩之
也書曰厥脩乃來言如水之來不竭也來斯積積斯脩
矣是故善繼人者大其身大身脩德之謂也詩曰無念
爾祖聿脩厥德

梯瀛樓記

瀛洲列仙所居自唐以爲翰林之喻謂其清榮貴逸非
諸司比也然必華實無茂群超萃拔於人人中乃始得
居焉東臬先生姪公自少精義理富蓄積發之文詞溫
醇而敷暢每一篇出人爭傳之雋味而珍韻比舉進士

爲禮部主事京師四方之士負笈雲會堂上席滿則改足階凡之間引領耳聞之外執經而聽者濟濟乎不可勝數講罷無不解頤以退已而提學閩粵從游之士編牒莫載數十年來擢科取仕紛綸而繼起而其秉翰王堂揚芬振烈又進而爲名卿碩輔者亦旣若干人矣今兵部侍郎冠公子敦嘗守四明移書同門之士各捐俸市材樹樓於東臬之上以識講學之舊樓成而公子維東以狀元及第公乃顏其樓曰梯瀛屬予記之予觀漢史儒林之盛桓丁爲最蓋生徒萬計而名位崇重者各不過三數人焉及蹟其平生樹大又未有焯然爲當世

所倚賴者夫經術周於用也故切而非迂文詞微於行也故實而不夸公領學政則德化行矣職旬宣則惠澤溥矣掌內外臺則憲度貞矣居本兵鎮南北徼則威烈振矣雖媚夫譁張暫沫白黑而公自處卓然不爲少動視彼羞曲士之節惜不貲之軀奢樂恣性黨附成譏者於經術何如也

天子雅知公名召命方下將寄公鈞衡夫以當今之世內脩而不炫峻而不詭足乎此而自達乎彼顯吾儒之實用洗夸誕之陋習非公其誰也維東先生以家學馳聲翰林又若干年矣他日當史局作儒林傳必首及

公是固天下公議而非一家之私也予不佞嘗誤從史官後敢記梯瀛之樓以爲持公議者先焉

中岡記

廣昌之西有岡焉去縣治三十里而近其左武陵金鰲其右獅嶺龍穴芙蓉金坪擁其後而仙橋秀嶺屏其前四面距岡各十里許空翠環遶界斷塵區而岡特蜿蜒其中故曰中岡岡之陽兩溪合流若蒼玉映帶澄瑩心目冠族曾氏負岡面溪而屋今定海儒學教諭樞曾之彥也以中岡爲號間介吾弟新甫問中說於予予嘗讀易而悟中之爲義之大也今夫天地之間雨暘寒燠少

乖于度則災沴見入之身榮衛脉理少失其平則疾疢作是故剛柔緩急或過而行必疚焉寬猛弛張稍愆而物必病焉夫是以有執中之堯而後有協和之績故曰中也者和也中節也天下之達道也夫所謂天下之達道者萬化不中不行萬物不中不生萬事不中不成禮不大則樂不興是故易之道可一言而盡也中焉止矣故曰易其至矣乎至也者極也猶射之的也不中不足以爲極良其背不獲其身中之大也行其庭不見其入中之行也惟中足以表民書曰民心罔中惟爾之命中中也詩曰民之多辟無自大辟戒失中也觀於中罔者可

以卓然而大矣曾君之設教也克敬克寬以得士心其進而大用於今日於以輔堯舜之治將不有在乎蓋君之祖嘗種竹於所謂中岡者自彌竹坡迂老何文肅公稱其溫恭好禮斥去豪華以詩書自娛則君之學固有所自也乃爲之記

樂閒軒記

樂閒軒者遼惠王爲樂閒李翁題也公沒餘二十年其軒固在其孫遂以監察御史奉

命巡按江西于貴尊人封君在堂將便道歸省且脩葺舊軒昭遺德以傳子孫列狀請記於予予昔提學湖南

嘗三至江陵識御史君庠校中而因以知翁父子之賢
蓋三十年于此矣今與御史君同朝又十餘年知翁加
詳爲之記曰樂聞翁非不事事其善事事之謂也翁少
治舉子伯氏領鄉薦舍而治生伯氏令長寧守潼川翁
飭子姓理家政不戚以內故喪死養生協相以禮食指
日繁劑量均適已而歎曰以兄報國以子姪托蒸禴吾
曷爲蜷局鄉園爾乎沿漢沔而東登金陵覽都會之勝
名縉紳高人逸士往往交焉見窮乏者輒散所有周之
比潼川公歸政曰吾兄完名而歸吾亦老矣姜被之溫
時能幾何遂不復遠遊而構軒數楹於後園日置酒集

賓朋陶陶然樂也歲饑米騰貴道殣相望所親或勸令分與翁泣曰豐歲同饔飩則析之吾獨能飽使骨肉爲溝中瘠邪乃罄所有易米食之每昏嫁則人之子先於子或責公不拓私產何以貽後曰吾以一經教吾子幸而識者率以科第相期吾貽產殆不爲薄乎蓋善事其家如此性喜飲酒客至必款洽徵會必赴然自晨至巳不飲曰恐妨事也逮夜不飲曰恐傷神也嘗自歎曰人苦不知足夏一葛冬一裘飯一盂居有敝軒飲有濁酒爲太平之民吾樂多矣蓋善事其身如此無畔援無將迎與物無眈防應事無滯礙遇不可處則曰寧人負

我無我負人未嘗見其一顰眉焉郡守聞其德義甚見
信重然不爲苟謁雖見未嘗及公事鄉飲屢辭不赴人
被誣至死爲白其冤餽之金卒卻之一日飲於親戚吳
氏意忽忽不樂問之曰吾於所居門巷得遺金候失者
未至今去吾廬遠恐其人求弗得也告歸至則隣人羅
仁者被髮彌呼欲投于江問驗得實遂歸之蓋善事其
心如此翁善事事是以無事世之以多事自困者視翁
何如邪翁諱景字時望年近八十終于家子仕爲巴州
學訓導陞聚陽王府教授以遂貴封監察御史御史孝
友淳篤明果而文所就未涯翁平生無事惟積陰德一

念至老不衰於茲蓋重有徵云

奉親圖記

古云賢才出國將昌子孫賢族將大夫生賢子孫以興
閥九宗人皆願之顧其事在天而不可以覬幸得故豪
宕如劉景升勲猷如房玄齡杜如晦而卒不免爲後人
所嗟惜自古歷今類此豈少也抑亦有豫大門閭手植
庭槐以俟後之人而應不旋踵若持左券以取償於天
而無或爽者其故何也必其人知天不惑而潛孚冥格
積久而後動非一朝一夕話言之間偶逢而適中爲也
王吾鄴舊族而汝成昆弟吾固知其克大厥宗有年矣

益未及弱冠而尊人靜菴翁卽世事其母陳孺人孝敬
備至汝成稍長則代任劬勞恢裕生事承其二親之志
遺弟汝器藏脩郡庠旣復爲之輸粟于官而躋之太學
毋氏捐養喪塋以禮每念早失怙恃弗獲盡其孝養之
心日軫悲惻間命工繪像別爲一室而供奉焉名之曰
奉親之圖益明發不寐之懷罔替於出友之時而無忝
所生之志弭篤於沒世之後由是禮教興於家孝友聞
於鄉儕輩悅其賢而縉紳先生嘉其義嫺朋遍時髦車
馬隘閭巷可不謂賢胤矣哉迺厥所自則靜菴平生恭
遜恬默尚德而輕利儒而寔者繼之膏油死無歸者給

之樞機無忿疾于頑無凌侮于弱鄉邦稱善士無間言
焉孺人失儷惟終身勤約自持不列夫子之恒矩以訓
育遺孤授之業而竢之太玄修潛積內外相資者爲日
久矣于公食陰德之實王氏蕃穠植之功不在此茲乎
故吾觀于奉親之圖而益知汝成昆弟所以光大厥宗
者未艾也天下事庸有躐其本而茂於植者耶汝成昆
弟篤于孝愛事亡如存以是心也治民事君何施而
弗利然則昌我

邦家將於是乎在豈特宗祊之光云爾哉汝器力學有
遠志於予往來尤數以伯氏意奉圖屬予記旣數年而

予以冗奪未克成茲不遠千里謁予留都予逆知其意
不俟復請而命筆疾書詩曰因心則友則友其兄則篤
其慶載錫之光吾於汝器有望焉汝器勉乎哉應曰諾
持歸以復于伯氏

張文定公靡悔軒集卷之三